

Segun cierto partidonan politico, mientras cu pueblo no haya claridad

RESULTADO DI ELECCION TA KEDA

CUESTIONABEL

ORANJESTAD(AAN)
Durante cu campaña di eleccion tabata andando den full swing, diferente partido politico tabata cuestiona e forma di proceder di Consejo Supremo Electoral y tambe Censo cu mester a percura pa votadonan legal haya nan carchi pa bay vota.

Partido MEP, OLA, PARA, PPA, ADN a cuestiona e forma con carchinan yama "Oproepingskaart" a yega na cierto hendenan cu supuestamente no tabata tin ni e minimo derecho pa por bay vota pa un gobierno nobo na Aruba.

Riba dia di eleccion partidonan a nota cu aparentemente cierto cosnan no a bay manera mester ta y despues di eleccion a bin resulta cu e cantidad di hendenan cu a bay vota, no ta cuadra cu loke a sali publica riba listanan.

Tabata tin politiconan cu a bay vota cu henter nan famia y despues segun nan version nan por a nota cu na e stem-buro caminda nan a vota, e politico en cuestion no a haya un solo voto!!

Con por ta posibel cu un politico ta bay vota hunto cu mas cu 15 hende di su famia cu a core campaña pe y caminda nan a vota e politico cu sigur lo a vota pa su mes no a saca un voto?

Cu otro hende ta gaña bo cu nan lo vota pa bo y no haci tal durante dia di votamento, ta algo cu sa pasa, pero no cu un politico ta vota pa su mes y e no ta wak esaki riba lista di resultado di eleccion.

Partido MEP a entrega keho na Ministerio Publico pa asina laga haci un investigacion oficial, pero Ministerio Publico no a haya cu esaki tabata necesario y despues di eleccion MEP a bolbe keha publicamente, pero nada a pasa y tur hende a keda keto.

Kico tin di berdad cu nan a gara ilegalnan cu a bay trata di vota y con a para cu e hendenan aki?

Te awe pueblo no a haya ningun relato oficial di gobierno, relaciona cu e informenan cu tabata circula tur caminda, cu nan a gara ilegal-

nan cu kier a bay vota?


Con a para cu hendenan cu supuestamente no por a bin na remarke pa haya un pasport Hulandes pa vota y tog supuestamente nan a haya esaki den pura?

No por ta asina cu cierto irregularidadnan a keda constata y cu keho a ser entrega y te awe no a bin ni un solo investigacion, pa asina demostra cu eleccion a bay manera mester ta.

Si ta dje forma aki cos mester bay anto den futiro pueblo lo bay considera cualkier irregularidad durante eleccion na Aruba, como algo normal manera cu sa pasa na cierto paisnan Latino y otro paisnan.

Dje forma aki poco poco e fundeshi democratico ta ser mina, cu consecuencia cu nos por bay den direccion cu eleccion na Aruba den exterior por ser mira como un farce y asina pais Aruba ta perde cara internacionalmente.

Ladron a bay cu varios aparato electronico



ORANJESTAD(AAN): Un persona cu a mira ladronnan ta horta varios aparato electronico for di un negoshi na Noord a yama Polis.

Tabata diasabra madrua algo pasa di 4'or cu central di polis a manda un patruya den direccion di GT Electronics unda algun hombre a horta.


Ora cu polis a yega nan ta haya e porta hanco habri sin ningun persona den vecindario.

Despues ta aparece un hombre kende ta avisa cu el a mira un pickup blanco y cu dos hombre aden cu ta esnan responsabel pa e acto aki.

Mirando e scuridad tabata dificil pa logra coy e number di e auto cu e ladronnan tabata core cune.

Doño di e negoshi a ser avisa di e caso aki y el a presenta na e lugar unda nan a bise cu e tin cu bay warda di recherche pa asina entregá keho pa cu e caso aki.

OUT OF ORDER!!



Telefon di
DIARIO
826747

10/198-
u